

Siunnersuummut oqaaseqaatit

Oqaaseqaatit nalinginnaasut

1. Aallarniut

Kommunit aqunneqarnerat pillugu Inatsisartut inatsisaat (aqutsinermut inatsit) 2010-mi ukiakkut ataatsimiinnermi oqaluuserisassani immikkoortoq UKA2010/25 suliarineqarlunilu akuersissutigineqarpoq.

2012-imi Nakkutilliisoqarfik suliassamik suliaqarpoq, kommunalbestyrelsimi ilaasortaq naparsimanini pissutigalugu kommunalbestyrelsimi ilaasortaajunnaarumalluni qinnuteqaammik nassiussisimasoq pillugu. Suliassap sularineqarnerani apeqqut pinngorpoq, qinnuteqaammi pineqarnerasoq ilaasortaajunnaarallarnissaq aqutsinermi inatsimmi § 15, imm. 3 naapertorlugu imaluunniit kommunini qinersisarnermik inatsimmi § 50, imm. 1-imi aalajangersagaq naapertorlugu ilaasortaajunnaavinnissaq pineqarnerasoq. Suliassat assingusut siunissami pinngitsoortikkumallugit siunnersuutigineqarpoq kommunalbestyrelsimi ilaasortaajunnaarallarnissamik qinnuteqaateqarnermi piumasaqaatit imarisaat erseqqissarneqassasut aamma aalajangersakkami oqaatsit taaguutitut atorneqartut allanngortinneqassasut.

Aqutsinermut inatsisissatut siunnersuutip suliarineqarneranut atatillugu ataatsimiititaliani immikkut ittuni ilaasortat akissaateqartinneqarnissaannut periarfissaqartoqarnissaanik kissaat saqqummiunneqarpoq. Naalakkersuisut taamanikkut tunngavissaqartinngilaat kommunini sulinermut atatillugu akissaateqartitsisanermut tunngavissanik amerlanerusunik maleruagassiortoqarnissaa.

Aqutsinermik inatsisip akuersissutigineqarneraniit kommunit kommunerujussuarni, siammasissorujussuarmik sumiiffinni inassisimasuni, aaqqissugaanermik aamma ingerlatseriaatsinik misilittagaqarlualersimapput. Inuussutissarsiornermi atugassarititaasut arlalitsigut kommunip ataatsip iluani assigiinngitsorujussuusinnaapput, taamaammat aamma kommunip ataatsip iluani kulturikkut assigiinngissutsit annertusinnaasarput. Kommunit misilittagaat tunuliaqutaralugit kommunini sulinermi innuttaasut qanimut oqartussaaqataanerisa, innuttaasullu akuutinneqarnissaasa pitsanngorsaavigineqarnissaannut kommunit pitsaanagerusumik periarfissaqartinneqarnissaat Naalakkersuisut pissusissamisoorsoraat. Taamaattumik immikkut ataatsimiititalianut tunngatillugu maleruagassat allannguiffigineqarnissaannik siunnersuut imaqarpoq. Tamatuma nassatarissavaa kommunalbestyrelsit najukkami ataatsimiititalianik aamma immikkut ataatsimiititalianik pilersitsisinaanissaminnut annertuumik periarfissaqartitaalernerisa erseqqissinneqarnissaa. Peqatigitillugu najukkami ataatsimiititaliani ilaasortat

kommunalbestyrelsini ilaasortaajutiginnigitsut akissaateqartinneqarsinnaasalernissaannut tunngavissaqartoqalissaaq.

Siunnersuutip aammattaaq kingunerissavaa borgmesterit soraarnerussutisiassaqartinneqarnerannut tungaatillugu Inatsisartuni Naalakkersuisunilu ilaasortat assigalugit aaqqissuussinernik soraarnerussutissiassaqarfinniit namminersorluutik ingerlasunit neqeroorfigineqarsinnaalissammata. Taamaalilluni KANUKOKA-miit kissaatit saqqummiunneqarsimasoq akuersaarneqartussanngussaaq.

2. Siunnersuutip imarisai pingaarnert

2.1. Kommunalbestyrelsip ataatsimiinneranni peqataannginneq

2.1.1. Inatsiseqarnek atuuttoq

Aqutsinermi inatsit § 15, imm. 2 naapertorlugu kommunalbestyrelsimi ilaasorta, pissutissat erseqqinnerusumik taaneqartut naapertorlugit kommunalbestyrelsimiit qaammatit marluk sinnerlugit ilaasortaajunnaarallartariaqartoq, borgmesterimut qinnuteqaammik nassiussaqassaq.

Inatsimmi § 15, imm. 3 naapertorlugu kommunalbestyrelsi aalajangiissaaq, kommunalbestyrelsimi ilaasortap ilaasortaajunnaarallarnissaanut aamma sinniisussap ilaasortanngornissaanat piumasqaatit naammassineqarnersut.

Inatsimmi § 15, imm. 2 naapertorlugu aallaaviatigut ilaasortaajunnaarallarnervuq. Pissutsit asigiinnigitsut pissutigalugit ilaasortaajunaarneq pisinnaavoq piffissami qinigaaffiup sinnerani. Pissutsini taamaattuni pineqarpoq ilaasortaajunnaavinneq.

Kommunalbestyrelsimi ilaasortaajunaarnermut pissutaasut aporfiusut peerussimappata, pineqartoq pisinnaatitaavoq kommunalbestyrelsimi ilaasortaqqilernissaminut. Kommunalbestyrelsimi ilaasortaaneq qinikkatut inuiaqatigiinnik sullissineruvoq. Taamaattumik ilaasortamut ilaasortaajunnaarallarsimasumut pisussaaffiuvoq ilaasortatut atuuteqqilernissaq, ilaasortaajunnaarallarnernut pissutaasut peeruppata.

Kommuninut qinersisarnermi inatsimmi § 50 naapertorlugu aalajangersarneqarpoq piffissami qinersiviup iluani kommunalbestyrelsimi ilaasortaajunaartoqarsinnaasoq erseqqinnerusumik pissutissatut taaneqartut naapertorlugit. Aalajangersakkani pineqarput pissutsit, kommunalbestyrelsimi ilaasortap piffissami qinersiviup sinnerani ilaasortaajunnaarneranut tunngasut. Pisuni taamaattuni ilasorta qiffissami qinersivimmi kingusinnerusukkut kommunalbestyrelsimi ilaasortatut atuutseqqilersinnaanngilaq, ilaasortaajunnaarnermi tunngaviusut peerukkaluarpataluunniit. Taamatuttaaq kommunalbestyrelsi tunngavissaqanngilaq aalajangiisalluni, pineqartoq ilaasortatut atuutseqqilissasoq.

2.1.2 Isumaliutigineqartut

Aqutsinermi inatsimmi § 15, imm. 2 naapertorlugu ilaasortaajunaartarnernut suliassat kommunalbestyrelsini suliarineqartarnissaanni tunngavissap erseqqissuunissaa qulakkeerumallugu tulluurtuuvoq ilaasortaajunnaarnissamut qinnuteqaatit imarisaannut tunngatillugu piumasaqaateqarnissaq. Qinnuteqaammi piumasaqaatinut ilaatinneqartariaqarput qinnuteqaateqarnermut pissutaasoq aamma pissutaasup sivilissusissaattut naatsorsuutigisaq. Taamatuttaaq inatsimmi ilaatinneqartariaqarpoq, ilaasortaajunnaarallarnernut pissutaasumut uppernaarsaatit, naak taamatut piumasaqaateqarnissaq pisinnaagaluartoq ingerlatsinermut inatsit nalinginnaasoq naapertorlugu.

2.1.3 Siunnersuut

Siunnersuummi siunertarineqarpoq kommunalbestyrelsimi ilaasortaajunnaarallarnissamik qinnuteqaatit imarisaat pillugit piumasaqaateqartalernissaq, aqutsinermi inatsimmi § 15, imm. 1-imi pissutitut taaneqartut malillugit. Peqatigisaanik taaguut ”ilaasortaajunnaarallarneq” allanngortinneqartoq imaalersillugu ”akisaateqarani sulinnigiffeqarallarneq” imaluunniit ”sulinnigiffeqarallarneq”. Sulinnigiffeqarallarnissamik qinnuteqaammi pissutaasutut tunuliaqutaasoq pillugu paasissutissaq ilaatinneqassaaq aamma tamatumunnga aporfiusutut pissutaasup qanoq sivilisutiginissaa naatsorsuutigineqarnersoq.

Taamatuttaaq qinnuteqaammut ilaatinneqassapput uppernarsaatit, tassalu aqutsinermi inatsimmi § 15, imm. 1-imi pissutaasutut pissutit taagorneqarneqartut.

2.2. Najukkami ataatsimiititaliat aamma immikkut ataatsimiititaliat

2.2.1. Inatsiseqartitsineq atuuttoq

Aqutsinermut inatsimmi § 31, imm. 1 aamma 2, tassaapput maleruagassat allat naapertorlugit kommunalbestyrelsip sinniisuutitaqarfigisassaani ataatsimiititaliani, kommissionini, siulersuisuni assigisaanilu ilaasortassanik toqqaasarnermut tunngasut. Matumani pineqartut tassaapput oqalliffiusartut, atunneri aqutsinermut inatsit najoqqutaralugu aqutaanatik maleruagassat allat atorlugit aalajangersaaffigineqarsimasut. Oqalliffiusartut tamakku kommunalbestyrelsip nalinginnaasumik akisussaaffiisa avataani atuuttarput.

Aqutsinermut inatsimmi § 31, imm. 3, immikkut ataatsimiititalianut aalajangersimasunik suliakkerneqartunut imaluunniit kommunalbestyrelsip aningaasaqarnermut ataatsimiititaliaata ataatsimiititalialluunniit ataavartut suliassaannut piareersaataasumik suliaqartartussanut siunnersuisartussanulluunniit tunngasuvoq. Immikkut ataatsimiititaliat kommunalbestyrelsip nalinginnaasumik akisussaaffeqarfiata iluaniipput. Kommunalbestyrelsip kiffaangissuseqarluni aalajangersinnaavaa immikkut ataatsimiititaliamik pilersitsisoqassanersoq.

Aqutsinermut inatsimmi § 31, imm. 4 tassaavoq § 31, imm.1-imi taakkartorneqartunut, tassalu ataatsimiititalianut il.il. kommunabestyrelsimi ilaasortaariinngitsunik aamma immikkut ataatsimiititaliani § 31, imm. 3 naapertorlugu pilersinneqarsinnaasuni ilaasortassanik toqqaasarnissamut maleruagassanik tunngavissaq.

Aqutsinermut inatsimmi § 66 malittarisassiuunneqarpoq kommunalbestyrelsimi ilaasortat aalajangersimasumik angissusilikkanik akissaateqartinneqartassasut. Aalajangersakkat allat tunngavigalugit saniatigut akissaateqartinneqarnissamik aalajangersaasoqarsimangippat, taava aalajangersimasumik angissusilikkanik akissaatigitinneqartussaniit matussuserneqartartussat ilaatigut tassaapput kommunimi suliassanut atatillugu ataatsimiinnerni peqataanerit. Immikkut ataatsimiititanik § 31, imm. 3 naapertorlugu pilersitsisoqartillugu kommunalbestyrelsi tamatumunnga atatillugu akissaateqartitsisinnaangilaq. Tamanna aamma atuuppoq ilaasortassanik toqqaanermi kommunalbestyrelsimi ilaasortaareersuunngitsunik toqqaasoqarpat.

2.2.2. Isumaliutigineqartut

Kommunerujusssuarni kommunalbestyrelsit § 31, imm. 3 naapertorlugu immikkut ataatsimiititaliortoqarsinnaanera pillugu maleruagassanik atuuttunik annertunerusumik atuisoqarsimaneranik takussutissaqanngilaq.

Piffissap nalinginnaasumik suliffiusartup iluani kommunini suliassanik suliaqartarnerup kinguneranik innuttaasut ilarpassui isertitassanik annaasaqartariaqarneranik kinguneqarsinnaavoq. Taamaattumik innuttaasut sulisinnaasutut ukioqartut akissaateqartinneqarsinnaangikkunik kommunimik sullissisinnaanerat artukkersuutaasinnaassasoq naatsorsuutigisariaqarpoq. Taamaattumik akissaateqartinneqarsinnaagaanni najukkami ataatsimiititaliami ilaasortassatut toqqagaanissaq kajuminnerulissutaasinnaassasoq ilimagineqarsinnaavoq.

Pingaaruteqarsimasinnaavoq inatsimmi § 31, imm. 3-mi naammaginartumik ersersinneqanngimmat maleruagassami tassani najukkami ataatsimiititaliat ilanngullugit maleruagassiuunneqarsimasut. Aamma paatsuungassutaasinnaavoq immikkut ataatsimiititaliat kommunalbestyrelsip qinigaaffiata aallartinnerani pilersinneqarsimanissaannik maleruagassaq piimasaqaatitaqarfiunersoq imaluunniit ataatsimiititalianik pilersitsisoqarsinnaanera ataavartumik periarfissaanersoq.

2.2.3. Siunnersuut

Siunnersuutip nassatarissavaa aqutsinermut inatsimmi § 31 avinneqassammat § 31-imut aamma § 31a-mut. Taamaaliornikkut § 31-imi illoqarfinni ataasiakkaani najukkami ataatsimiititaliat aamma immikkut ataatsimiititaliat tamarmik immikkuullarissunik maleruagassiorfigineqarput.

Siunnersuut manna atorlugu komunalbestyrelsit illoqarfinni ataasiakkaani najukkami ataatsimiititalianik pilersitsiortornerat aqutugalugu suleqatigeeriaatsinik pilersitsiortortoqarnissaa siunertarinqarpoq, taamaaliornikkut najukkami assigiinngitsunik soqutigisallit kommunimi suliaasartunut akuliusimalersinniarlugit. Najukkami ataatsimiititaliat qinigaaffiup ingerlanerani piffissami killilikkami atuuttussanngortinneqarsinnaapput, imaluunniit qinigaaffik naallugu atuuttussaatinneqarsinnaallutik, aamma qinigaaffimmi tullermi pilerseqqinneqarsinnaapput.

Maleruagassaq ilusilerneqarpoq kommunalbestyrelsit najukkami ataatsimiititaliat qanoq katitigaanissaannik annertuumik kiffaangissuseqarsinnaanngorlugit. Nunaqarfinni aqutsisussarsiornermi periaaserineqartartunit allaanerussutaassaaq kommunini qinersisarnermut inatsit malillugu qinersititsisoqartassanngimmat. Qinersitsitsisarnermut taarsiullugu kommunalbestyrelsit namminneerlutik najukkami ataatsimiititaliat qanoq inuttalersugaanermikkut katitigaassanersut aalajangersaavigisinnaavaat. Aamma kommunalbestyrelsit kommunip ataatsip iluani illoqarfimmi ataatsimi arlalinniluunniit najukkami ataatsimiititalimik pilersitsinngitsuunginnarsinnaapput.

Innuttaasut najukkami ataatsimiititaliani peqataanissaannut soqutiginninnerulersinniarlugit najukkami ataatsimiititaliami ilaasortat, kommunalbestyrelsimi ilaasortaareersuunngitsut, aalajangersimasumik angissusilimmik akissaateqartinneqarsinnaanissaannik siunnersuutip imarisaa periarfissiivoq. Akissaatigitinneqartussatut aalajangiussaq akissaatigitinneqarsinnaasut amerlanerpaaffigisinnaasaattut aalajangiussaq Naalakkersuisuniit angissuligaasartussaq sippornagu angissuseqartinneqartassaaq. Najukkami ataatsimiititaliani siulittaasut akissaataasa tapeqartinneqarsinnaanissaat siunnersuummi periarfissiissutigineqanngilaq.

Kommunalbestyrelsit aalajangertassavaat najukkami ataatsimiititaliani ilaasortanut aalajangersimasunik amerlassusilikkat iluanni akissaateqartitsisoqassanersoq, tassunga ilanngullugu akissaatit amerlanerpaaffigisinnaasaattut aalajangiussat qaangernagit amerlassuseqartussat qanoq amerlatigitinneqassanersut. Aalajangersimasunik amerlassusilinnik akissaateqartitsisoqarnissaanik aalajangernermi taakkulu amerlassusilerneqarneranni kommunalbestyrelsip assersuutigalugu erseqqissaatigisinnaavaa najukkami ataatsimiititaliani peqataaneq kommunalbestyrelsini nunaqarfinnilu aqutsisussanik qinersisoqartarnera assigalugu toqqaannartumik qinigaasoqarneq ajormat. Aamma erseqqissarsinaavaat suliassaqarfiit suut il.il. najukkami ataatsimiititaliat sularisinnaaneraat, aamma tassunga ilanngullugu najukkami ataatsimiititaliani ilaasortat suliassaat ilaasortanut qanoq suliakkersuutaatigissagunarnersut.

Suliassat immikkuullarissut kommunalbestyrelsimi, aningaasaqarnermut ataatsimiititaliami imaluunniit ataatsimiititaliani ataavartuni sularineqartarnissaat siunertaralugu, immikkut ataatsimiititaliortoqarsinnaaneranut maleruagassat atatiinnarneqassapput. Immikkut

ataatsimiitaliani peqataanermut akissaateqartitsisoqarsinnaanissaanut najoqqutassanik siunnersuut imaqqanngilaq.

2.3. Borgmesterinut soraarnerussutisiat

2.3.1. Maleruagassat atuuttut

Aqutsinermut inatsimmi § 67-imi borgmesterit akissaateqartinneqarnerannut, soraarnerussutisiaqartinneqarnerannut kiisalu borgmesteritut suliunnaarnermi aningaasarsiassaqaqtitsineqarnerannut tunngasut maleruagassiorfiginissaat najoqqutassiuunneqarpoq.

Borgmesterit soraarnerussutisiaqartinneqarnerannut tunngasut borgmesterit soraarnerussutisiaat qinigaajunnaarneriutaallu aammalu taakkua aappaasa meeraasalu taakkuninnga pissarsisinnaaneri pillugit Namminersorlutik Oqartussat nalunaarutaat nr. 8, 24. maj 2012-imeersumi aalajangersaavigineqarput. Nalunaarut taanna borgmesterit qinigaajunnaarneriutaat soraarnerussutisiaallu aammalu taakkua aappaasa meeraasalu taakkuninnga pissarsisinnaaneri pillugit Namminersornerullutik Oqartussat nalunaarutaat nr. 23, 12. september 1997-imeersup taartigaa.

Nalunaarut 2012-imeersoq Inatsisartut Ombudsmandiata nalunaarutaata malitsigisaatut atuutsilersinneqarpoq. Ombudsmandip nalunaarummini ersersippaa borgmesterit qinigaajunnaarneriutaat soraarnerussutisiaallu aammalu taakkua aappaasa meeraasalu taakkuninnga pissarsisinnaaneri pillugit Namminersornerullutik Oqartussat nalunaarutaat nr. 23, 12. september 1997-imeersumi § 12 borgmesteritut sulisimanermit soraarnerussutisiat ikilineqarsinnaasarnerannut tunngasunik imaqqartoq naammattumik tunngavissaqqanngitsoq. Tamanna tunngavigalugu nalunaarut ikililerisarsinnaanermut maleruagassanik najoqqutassanik imaqqartinneqanngilaq.

2.3.2. Isumaliutigineqartut

Namminersorlutik Oqartussat nalunaarutaat nr. 8, 24. maj 2012-imeersumut missingiutip tusarniaassutigineqarneranut atatillugu KANUKOKA kajumissaaruteqarpoq maleruagassat nutaamik misissuiffigineqarnissaat piaarnerpaamik aallartinneqassasoq.

Taamaattumik soraarnerussutisiaqaqtitsisarfinnit namminersorlutik ingerlasuniit soraarnerussutisiassat pillugit inunnut ataasiakkaanut aqqissuussinernik pilersitsisoqartalernissaanik maleruagassanik erseqqinnerusunik suliaqqartoqarnissaanik tunngavissamik siunnersuut siunertaqarpoq. Maleruagassat taakku inunnut siunissami borgmesteritut sulilerumaartunut sunniuteqarlutik atuutsissapput.

Siusinnerusukkut borgmesteriusimasut allatigut isertititaqarsimagunik soraarnerussutisiassaasa ikilineqartarnissaannut maleruagassanik najoqqutarineqarsinnaasussamik siunnersuut imaqqartinneqanngilaq. Katersaqarneq

tungavigalugu soraarnerussutisiaqarnissamut pisinnaatitaaffeqalereernermi allanik isertitaqarneq pissutigalugu soraarnerussutisiassat ikilineqartarnissaannik maleruagassat atuuttussanngortikkuminaassapput. Soraarnerussutisiaqarnissamut siunissami aaqqissuuseriaaserineqalersussat inuttut namminerisamik aaqqissuussivigineqarneq atorlugu aaqqissuussivigineqarnissaat siunnersuutigineqarmat, taamatut aaqqissuussivigineqartut ikilisaassiffigineqartarnissaannut periarfissaqanngilaq. Taamaattumik ilimagineqarpoq allanik isertitaqarneq pissutigalugu ikilisaasinnaanerit aningaasaqarnermut sunniutigisinnaasaat annikitsuinnaassasut.

2.3.3. Siunnersuut

Aqutsinermut inatsimmi § 67 borgmesterinut il.il. akissaateqartitsinerup soraarnerussutisiaqartitsinerlu pillugit maleruagassiorsinnaanermut aqutissiuussiffiuvoq. Siunnersuummi maleruagassat § 67-imut aamma § 67 a-mut avinneqarput.

Siunnersuummi § 67 borgmesterinut il.il. akissaateqartitsinermut aamma qinikkatut suliunnaarnermi aningaasarsiaqartitsisinnaanermut maleruagassiorsinnaanermut aqutissiuussivoq. Akissaateqartitsinermut aamma qinikkatut suliunnaarnermi aningaasarsiaqartitsisinerup tungaatigut maleruagassiorsinnaanermut najoqqutassanik allannguisoqanngilaq.

Taaguut ”borgmesteritut suliunnaarnermi akisaatit”, maleruagassani maanna atuuttuni taaguutitut atorreqartoq atorunnaarlugu, taaguut tikkuussilluarnerusoq siunnersuummi taaguutigitinneqartoq tassaavoq ”suliunnaarnermi aningaasarsiat”. Oqaaseq ”akisaatit” aamma taamaaqqataat nalinginnaasumik atorfinitsitsinermi atorreqartarput. Tamannalu borgmesteritut sulisussanngornermi pineqarneq ajorpoq.

Siunnersuummi § 67 a tungavissamik pilersitsissaaq borgmesterit aamma taakku aappaasa meeraasalu soraarnerussutisiaqartarnerat pillugu maleruagassiorsinnaanermik.

Aalajangersakkap nassatarissavaa Naalakkersuisut maleruagassanik aalajangersaasinnaalernerat, siunissami borgmesterit soraarnerussutisiaqartarnerat pillugu Inatsisartuni Naalakkersuisunilu ilaasortat soraarnerussutisiaqartarnerannut tunngatillugu naligiimmik pineqartalernissaanik nassataqartumik.

Massakkut borgmesterit pisinnaatitaaffeqarnertik tungavigalugu naatsorsuutigaat maleruagassat atuuttut naapertorlugit qinigaaffik piffissaq tamaat soraarnerussutisiassanik suli katersillutik. Taamaattumik inunnut ataasiakkaanut soraarnerussutisiassaqaqarnissamik pisinnaatitaaffeqarnermut annertuumik pingaaruteqarpoq maleruagassanut maannamut atuuttunut suli ilaatinneqarnissaq. Tamatuma malinneqarnissaa isumannaarniarlugu siunnersuummi ilannguneqarpoq ikaarsaariarnermi aalajangersagaq, massakkut borgmesteriusunut periarfissiisooq maannamut maleruagassat atuuttut naapertorlugit soraarnissutisiaqarnissamik aaqqissuussinerup toqqarneqarnissaanik.

Soraarnerussutisiaqartitsinermut maleruagassanik toqqaaneq pissaaq kingusinnerpaamik Inatsisartut inatsisaata atortuulersinneqarneraniit qaammatit marluk qaangiutsinnagit. Taamaalilluni ilisimaneqarsinnaalissaaq kommunip missingersuutaani soraarnerussutisiassanut ataavartumik tapiisoqartassanersoq, imaluunniit aatsaat borgmestertit tunuarsimasup soraarnerussutisierilerumaagassai akiliutigineqarsinnaalerpata ataavartumik soraarnerussutisiaqartitsinermut aningaasartuutaalerumaartussat missingersuusiarineqarumaarnersut.

Inuit 2013-imi maajip aallaqqaataa sioqqullugu sivikinnerpaamik ukiuni arfineq pingasuni borgmesteriusimasut maleruagassat maanna atuuttut naapertorlugit soraarnerussutisiaqarsinnaatitaanertik sulii pisinnaatitaaffigissavaat.

Borgmesteriunerminniit siusinnerusukkut tunuarsimasut, ukiullu arfineq pingasut inorlugit borgmesteriusimasut, borgmesterit sulisimanerminnut atatillugu soraarnerussutisiaqarnissamut pisinnaatitsisumik katersaqarnikuunngillat. Inuit taakku soraarnerussutisiaqartitsinermut tunngatillugu inissisimanerat pillugu siunnersuutip imarisai allanngortitsinngilaq.

Borgmesterit soraarnerussutisiaqarnissamut, Inatsisartuni Naalackersuisunilu ilaasortanut atuutsinneqartut assingunik, aaqqissuussivigineqarsinnaanerat PFA Soraarnej atorlugu pisinnaavoq.

Allaffissornikkut aqutsineq pissutigalugu Inatsisartunut ilaasortanut aamma Naalackersuisunut ilaasortanut immikkut atortinneqartumik soraarnerussutisiaqartitsinissamik PFA Soraarnej-mut isumaqatigiissuteqartoqanngilaq. Taarsiullugu allaffissornikkut aqutsinermi sulisorisat aalajangersimasut ilaat soraarnerussutisiaqarnissaaq pillugu PFA Soraarnej-rup aamma Inatsisartut Allattoqarfiata isumaqatigiissutaanut ilaasortat ilaatinneqarput. PFA Soraarnej neqerooruteqarsimavoq borgmesteri isumaqatigiissummut tassunga ilaatinneqalersinnaasut. Isumaqatigiissut soraarnerussutisiaqalernissamik aaqqissuussinermik ataatsimoorussamik imaqarpoq, taassuma imarai:

- 1) Utoqqalinermi soraarnerussutisiat
- 2) Aapparissamut soraarnerussutisiat
- 3) Inaarluuteqalernermi soraarnerussutisiat
- 4) Meeqqanut soraarnerussutisiat

Aaqqissuussinermut, Inatsisartunut aamma Naalackersuisunut ilaasortanut atortinneqarmut assingusumut borgmesterit ilaalernissaanik nalunaaruteqarnerup nassatarissavaa, soraarnerussutisiassaqarnissamik isumaqatigiissummut ilaalernissamik piunasaqaat, PFA Soraarnej-mit suliarineqassammat aamma allaffissornikkut aqunneqassammat Inatsisartunut aamma Naalackersuisunut ilaasortanit atorineqartumut periusariveqartoq tunngavigalugu.

Taamatutaaq borgmesterit PFA Soraarneq-mi soraarnerussutisiassanik naaffeqartumik tunniunneqartartussanik, ataatsimoortumik soraarnerussutisiassaqaarnissamik aaqqissuussinerup saniatigut, imaluunniit soraarnerussutisiassatut akilersuutigineqartup ilaannik ilassummik aaqqissuussisinnaapput.

PFA Soraarnermiit ilisimatitsissutigineqarpoq soraarnerussutisiaqarnerup tungaatigut immikkuullarissumik ataatsimoortumik aaqqiiviginnittoqassappat ilaasortat taamaaliorniartut ikinnerpaamik tallimaasussaasut. Taamaattumik sulinermi peruserineqartut nalinginnaasut naapertorlugit borgmesterit kommuninit sisamaneersut pillugit immikkut isumaqatigiissuteqartoqarsinnaanngilaq.

2.4. Teknikikkut allannguutigitinneqartut

Aqutsinermut inatsimmi § 51, imm. 1-imi aamma 2-miittut Kommunalbestyrelsinut, nunaqarfinni aqutsisunut ilagiillu sinniisaannut qinersisarnerit pillugit Inatsisartut inatsisaanni 2012-imi ukiakkut ataatsimiinnermi akuersissutigineqartumi § 61, imm. 1-4-imut ilanngunneqarput. Taamaattumik aqutsinermi inatsimmi § 51, imm. 1 aamma 2 atorunnaarsinneqarput.

| Siunnersuutip imarisaa inatsisinut atuuttunut naleqqiullugu | |
|--|--|
| <i>Atuuttup oqaasertai</i> | <i>Siunnersuut</i> |
| | § 1 Kommunit aqunneqarnerat pillugu Inatsisartut inatsisaat nr. 22, 18. november 2010-meersoq imaattunik allannguuteqarpoq: |
| § 15. <i>Imm. 2.</i> Ilaasortaq imm. 1-imi taagorneqartuni patsiseqarluni piffissami qaammatinik marlunnik sivisunerusumik anisariaqaleruni taava borgmesterimut allakkatigut taamatut iliorniarluni nalunaaruteqassaaq. Borgmesterip sinniisussaq kommunalbestyrelsip ataatsimiinnissaanut tulliuttumut siullermut ataatsimiigiaqqussavaa. | 1. § 15, <i>imm. 2,</i> imatut oqaasertalerneqarpoq: ”Imm. 2. Kommunalbestyrelsimi ilaasortaq imm. 1-imi taagorneqartuni pissuteqarluni qaammatit marluk sinnerlugit suliassanik isumagisaqaarnissamik pisinnaanngitsoq, kommunalbestyrelsimut ilaasortaq akissaateqarani sulinngiffeqarallarnissamik qinnuteqassaaq. Sulinngiffeqarallarnissamik qinnuteqaat borgmesterimut nassiunneqassaaq, qinnuteqaallu imaqassaaq pissutaasutut tunuliaqutaasoq pillugu paasissutissamik aamma taamatut pisinnaanginnermut pissutaasup qanoq sivisutiginnissaa naatsorsuutigineqarnerisooq. Qinnuteqarnermut atatillugu uppersaatait pisariaqartut qinnuteqaammut ilaatinneqassapput imaluunniit borgmesterip |

| | |
|--|---|
| | <p>taakkuninnga noqqaassuteqarneratigut nassiunneqassapput. Tamatuma kingorna sinniisussaq ataatsimiinnissami tulliuuttumi siullermi peqataaqqullugu borgmesterip aggersassavaa.”</p> |
| <p>§ 15. <i>Imm. 3.</i> Kommunalbestyrelsip aalajangissavaa ilaasortap anigallarnissaanut aammalu sinniisussap isernissaanut piumasqaataasut eqqortinneqarnersut.</p> | <p>2. § 15, <i>imm. 3</i>, imatut oqaasertalerneqarpoq: ”<i>Imm. 3.</i> Kommunalbestyrelsip aalajangissavaa ilaasortap sulinngiffeqarallarnissaamik qinuteqaataani aamma sinniisussap isernissaanut piumasqaataasut eqqortinneqarnersut.”</p> |
| <p>§ 31. <i>Imm. 3.</i> Aammattaaq kommunalbestyrelsi ataatsimiititalianik immikkut ittunik pilersitsisinnaavoq suliassat aalajangersimasut isumagineqarnissaannut imaluunniit kommunalbestyrelsimut, aningaasaqarnermut ataatsimiititaliamut imaluunniit ataatsimiititalianut ataavartunut siunnersuisartussanik. Kommunalbestyrelsip aalajangissavai ataatsimiititaliat immikkut ittut katitigaanissaat taakkulu sulinissaat pillugit maleruagassat aalajangersassallugit.</p> | <p>3. § 31, <i>imm. 3</i>, atorunnaarpoq.</p> |
| <p>§ 31. <i>Imm. 4.</i> Kommunalbestyrelsi aalajangersinnaavoq kommunalbestyrelsimut ilaasortaannngitsunik toqqaassalluni tamanna inatsimmi allami immikkut ittunik periarfissatut akuerineqarsimappat, aammalu suliassat allat kommunalbestyrelsip akuersineratigut suliareqquneqartut.</p> | <p>4. § 31, <i>imm. 4</i>, matuma kingorna <i>imm. 3-nngortussaq</i>, imatut oqaasertalerneqarpoq: ”<i>Imm. 3.</i> Kommunalbestyrelsip aalajangiussinnaavaa ataatsimiititaliani il.il. <i>imm. 1</i>-imi taaneqartuni kommunalbestyrelsimi ilaasortaannngitsunik sinniisunik allanik toqqaasoqarnissaa, inatsisini allani immikkut ittunik taamaalorsinnaatitsisoqarpat aamma suliassanik allanik isumaginnittoqarsinnaatitaappat, kommunabestyrelsimit suliassatut tunniussanik.”</p> |
| | <p>5. § 31-<i>ip</i> kingorna ilanngunneqarpoq: ”§ 31 a. Kommunalbestyrelsi kommunimi illoqarfinni tamani najukkami ataatsimiititaliamik</p> |

| | |
|--|---|
| | <p>ataatsimiititalianilluunniit arlalinnik pilersitsisinnaavoq. Najukkani ataatsimiititaliat suliassa qarfinnik aalajangersimasunik isumaginnittuusinnaapput imaluunniit kommunalbestyrelsimut, aningaasaqarnermut ataatsimiititaliamut imaluunniit aamma ataatsimiititalianut ataavartunut piareersaasiornermik siunnersortaanermillu atuuffeqarsinnaallutik.</p> <p><i>Imm. 2.</i> Najukkami ataatsimiititaliat ilaasortalersugaanermikkut qanoq katitigaanissaat qanorlu annertutigisumik peqataatitsisoqassanersoq kommunalbestyrelsip aalajangiiffigissavaa, tassunga ilanngullugit kattuffiit, najukkani aalajangersimasuni innuttaasut ataatsimoortut, partiit aamma ataatsimoorlutik qinigassanngorteqatigiit inuilluunniit allat ataatsimiititaliani ilaasortassatut innersuussutigineqassanersut imaluunniit ataatsimiititaliat ataatsimiinnerini alaatsinaattutut peqataatinneqartassanersut.</p> <p><i>Imm. 3.</i> Najukkami ataatsimiititaliat suliassa qarfiit kommunalbestyrelsip aalajangersaavigissavai.</p> <p><i>Imm. 4.</i> Najukkami ataatsimiititaliami ilaasortanut, kommunalbestyrelsimi ilaasortaannigitsunut, kommunalbestyrelsi aalajangersimasumik angissusilikkamik aningaasarsiaqartitsisinnaavoq. Aningaasarsiaritinneqartussat tunniunneqarsinnaapput Naalakkersuisut aalajangersagaat tak. § 66, imm. 6 malillugu amerlanerpaaffissaliussat sippornagit.</p> <p><i>Imm. 5.</i> Kommunalbestyrelsimi, aningaasaqarnermut ataatsimiititaliami imaluunniit ataatsimiititaliani ataavartuni suliassat sularineqarnerannut atatillugu immikkut ilisimasaqartut aamma paasisimasallit imaluunniit immikkut ittunik soqutigisallit ilaatinneqartarnissaat</p> |
|--|---|

| | |
|---|--|
| | <p>siunertaralugu kommunalbestyrelsi ataatsimiititalianik immikkut ittunik pilersitsisinnaavoq.</p> <p><i>Imm. 6. Ataatsimiititaliat imm. 1-imi aamma 5-imi taaneqartut kommunalbestyrelsip atuuffissaata iluani piffissami aalajangersimaqqinnaartumi atuuttussanngorlugit qanorluunniit ilinikkut pilersinneqarsinnaapput.”</i></p> |
| <p>§ 34. Kommunalbestyrelsimi ilaasortat pisussaapput ataatsimiititalianut qinigaanitik akuerissallugit, takuuk §§ 24, 26 aamma § 31, aammalu suliassat allat kommunalbestyrelsip akuersineratigut suliareqquneqartut.</p> | <p>6. § 34-imi allanngortinneqarpoq ”§§ 24, 26 aamma § 31” imaalersillugit: ”§§ 24, 26, 31 aamma § 31 a”.</p> |
| <p>§ 51. Nunaqarfinni aqutsisussanik ataatsimoorussanik minnerpaamik kommunip iluani nunaqarfiit marluk peqataaffigisaannik qinersisoqartassaaq. Kommunalbestyrelsip aalajangersassavaa nunaqarfiit sorliit ataatsimoorussassaminnik aqutsisoqartinneqassanersut, aammalu pingasunik tallimanilluunniit ilaasortaqaassanersut. Aalajangerneq pissaaq ukioq nunaqarfinni aqutsisunik ataatsimoorussanik qinersiviususaaq sioqqullugu, ukiup naannginnerani.</p> | <p>7. § 51, imm. 1, imatut oqaasertalerneqarpoq: “§ 51. Nunaqarfinni aqutsisut ataasimoorussat aamma nunaqarfinni aqutsisut ilaasortanik 3-nik imaluunniit 5-inik amerlassuseqarput. Tamanna pillugu kommunalbestyrelsip aalajangernera pissaaq nunaqarfinni aqutsisussanik ukioq qinersiviususaaq sioqqullugu, ukiup naannginnerani.”</p> |
| <p>§ 51. <i>Imm. 2.</i> Naalakkersuisut pisuni immikkut ittuni imm. 1, oqaaseqatigiit aappaanni aalajangersakkamik sanioqqutsinissamut immikkut akuersissuteqarsinnaapput, nunaqarfiit avinngarusimasumiittut imaluunniit innuttaqqortuut eqqarsaatigalugit. Naalakkersuisut aalajangerni arnerminni oqimaalutarisinnaavaat kommunalbestyrelsit pineqartut nunaqarfinni aqutsisussanik ataatsimoorussanik aalajangersaanerminni</p> | <p>8. § 51, imm. 2, atorunnaarpoq.</p> <p><i>Imm. 3 aamma 4,</i> matuma kingorna tassaalissapput <i>imm. 2 aamma 3.</i></p> |

| | |
|---|---|
| <p>qanoq nunaqarfinnik aqutsinikkut katiterisimanerat, nunaqarfiit minnerpaamik marlukkaarmissaat eqqarsaatigalugu.</p> | |
| <p>§ 67. Naalackersuisut maleruagassiussapput:</p> <p>1) Borgmesterinut akissarsiaqartitsineq, soraarnerussutisiat aamma borgmesteritut suliunnaarnermi aningaasarsiassat pillugit.</p> <p>2) Borgmesterit tullersortaanut imaluunniit kommunalbestyrelsimi ilaasortanut borgmesterip peqannginnerani paarlattaasunut akissarsiarititassat pillugit.</p> | <p>9. § 67, imm. 1, imatut oqaasertalerneqarpoq: ”§ 67. Naalackersuisut maleruagassanik tunniussisarnissamullu tunngasut makkununga tunngasut aalajangersaaffigissavaat:</p> <p>1) Borgmesterinut aningaasarsiaqartitsisarneq aamma soraarnerussutisiaqartitsisarneq.</p> <p>2) Borgmesterit tullersortaasa imaluunniit kommunalbestyrelsimi ilaasortat, borgmesterip peqanngikkallarnerani borgmesterip suliassaanik isumaginnittussanngortitaasut aningaasarsiaqartinneqartarnerat.”</p> |
| | <p>10. § 67-ip kingorna ilanngunneqarput: ”§ 67 a. Naalackersuisut makkununga tunngasut maleruagassiorfigissavaat:</p> <p>1) Borgmesterinut aamma taakku aapparisaasa qitornaasalu soraarnerussutisiassaannik tunniussisarnissaq.</p> <p>2) Inatsisartuni Naalackersuisunilu ilaasortat soraarnerussutisiaqartinneqartarnerannut maleruagassat atuuttut assigisaannik borgmesterit soraarnerussutisiaqarnissamik inuttut aaqqissuussisivigineqarnissaat.</p> <p><i>Imm. 2.</i> Inuttut namminerisamik soraarnerussutisiaqalernissamut aaqqissuussivigineqarsinnaanissamik maleruagassat 2013-imi maajip 1-ani taassumaluunniit kingorna borgmesterinngortunut atuutissapput, tak. imm. 1, nr. 2. Maleruagassat taakku naapertorlugit soraarnerussutisiaqarnissamik aaqqissuussinerit pilersinneqartut siusinnerpaamik aatsaat 2014-imi januarip 1-ani pilersinneqarnerat atortuulersinnaapput.</p> <p><i>Imm. 3.</i> Borgmesterit, qinigaaffimmi 2013-</p> |

| | |
|--|--|
| | <p>imi naasussami sivikinnerpaamik ukiuni sisamani borgmesterioreersimasut, imm. 2-mi aalajangersagaq malinngikkaluarlugu imm. 1, nr. 1-imi maleruagassat naapertorlugit pineqarnissartik toqqarsinnaavaat.</p> <p><i>Imm. 4.</i> Soraanerussutisiaqariaasererustamik toqqaaneq tak. imm. 3, kingusinnerpaamik Inatsisartut inatsisaata atortuulerneraniit qaammatit marluk qaangiutsinnagit kommunalbestyrelsimut allakkatigut nalunaarutigineqassaaq. Toqqagaq pituttuisuussaaq siunissamilu borgmesteriusarnissami najoqqutarineqartassalluni.”</p> |
| | <p style="text-align: center;">§ 2</p> <p>Inatsisartut Inatsisaat 1. januar 2014-imiit atuutuilissaaq.</p> |

3. Pisortani aningaasaqarnermut aamma allaffissornermi sunniutissat

3.1. Aningaasaqarnermut sunniutissat

3.1.1. Najukkami ataatsimiititaliat

Kommunalbestyrelsit aalajangissappata najukkami ataatsimiititalianik pilersitsiniarlutik ilaasortannngortussallu, kommunalbestyrelsini ilaasortaareersuunngitsut, akissaateqartinneqarlutik, tamanna kommuninut aningaasartuuteqarnerulernermik malitseqassaaq.

Najukkami ataatsimiititaliani ilaasortanut aalajangersimasumik angissusilikkamik akissaateqartitsinissamut tunngavissamik pilersitsisoqarneranut atatillugu nalunaarummik nutaamik atuuttussanngortitsisoqassaaq, tassanilu aalajangersimasumik angissusilimmik akissaateqartitsinissami qummut killissaliunneqartussaq aalajangersaavigineqassaaq. Akissaatit amerlanerpaaffigisassaata nunaqarfinni aqutsisunut tunniunneqartartut amerlassusiannut naapertuuttuussapput. Tamatuma naligaa borgmesterinut akissaatigitinneqartartut 1/12-del-iat. Piffissami atuuttumi borgmesterinut akissaatigitinneqartartut tunngavigissagaanni najukkami ataatsimiititaliani ilaasortannngortarumaartussanut akissaatigitinneqartussat amerlanerpaaffissaat ukiumut 74.000

kronit missiliorlugit ilaasortamut ataatsimut amerlassuseqartussatut naatsorsorneqarsinnaapput.

Aningaasaqarnermut sunniutaasinnaasut paasinarsarniarlugit najukkami ataatsimiitaliani ilaasortat akissaatissaannut aningaasartuutaasinnaasut naatsorsorneqarsinnaapput ilimagineqarsinnaasut makku tunngavigalugit:

- 1) Najukkami ataatsimiititalinik 18-inik pilersitsisoqassasoq.
- 2) Najukkami ataatsimiititaliat tamarmik tallimanik ilaasortaqqassasut.
- 3) Akissaatit amerlanerpaaffigisinnaasaat naapertorlugit najukkami ataatsimiitaliani ilaasortat tamarmik akissaateqartinneqassasut.
- 4) Ilaasortamut ataatsimut akissaatigitinneqarsinnaasut amerlanerpaaffissaat ukiumut 74.000 kroniussasut.

Najoqqutarineqarsinnaasutut qulaani taaneqartut aallaavigissagaanni najukkami ataatsimiitaliani ilaasortanut akissaatigitinneqartussatut naatsorsuutigineqarsinnaasut skemami matuma ataaniittumi takuneqarsinnaapput

| Kommuni | Ataats. amerlass. | Kommunip aningaasartuutissai |
|--------------------------|-------------------|--------------------------------|
| Kommune Kujalleq | 3 | 3x5x74.000 kr. = 1.110.000 kr. |
| Kommuneqarfik Sermersooq | 5 | 5x5x74.000 kr. = 1.850.000 kr. |
| Qeqqata Kommunia | 2 | 2x5x74.000 kr. = 740.000 kr. |
| Qaasuitsup Kommunia | 8 | 8x5x74.000 kr. = 2.960.000 kr. |

Akissaatigitinneqartussanut aningaasartuutissat saniatigut angalanernut ataatsimiinnernullu atatillugu allanik aningaasartuuteqartoqarsinnaavoq. Tamakkulu saniatigut kommunalbestyrelsini ilaasortat illoqarfinni ataasiakkaani najukkami ataatsimiitalianik naapitserusullutik angalasarnissaannut atatillugu aningaasartuuteqartoqartalernissaa pisinnaavoq.

Kommunalbestyrelsit namminneerlutik aajangersinnaatitaavaat najukkami ataatsimiititaliornerit qanoq atugaritiginiarnerlugit, taakkunungalu akissaateqartitsinissamut periarfissat pillugit maleruagassat atugassanngortinneqartarnissaat qanoq periaaseqarfiginiarnerlugit. Illoqarfinni ataasiakkaani arlalinnik najukkami ataatsimiitalianik pilersitsisoqarpat naatsorsuinnermut qulaani tunngavigineqartut najukkamilu ataatsimiitaliani ilaasortat amerlassusiat apeqqutaallutik aningaasartuutaasartussat qulaani naatsorsorneqartuniit amerlanerulersinnaapput. Taamatutaaq aningaasartuutaasartussat ikilisarneqarsinnaapput assersuutigalugu najukkami ataatsimiititaliat amerlassusaasa killilerneqarnerisigut, imaluunniit akissaatigitinneqarsinnaasut amerlanerpaaffigisinnaasaattut periarfissiissutigineqartuniit minnerusumik akissaateqartitsinikkut.

3.1.2. Soraarnerussutisiat

Borgmesterit soraarnerussutisiaqartinneqartarnerisa Inatsisartuni Naalakkersuisunilu ilaasortanut atuutinneqartut assigilersillugit allanngortinneqarneratigut borgmesterinut

akissaatigitinneqartartut 10 %-iannik kommunit akiliuteqartalissapput. Borgmesterinut maanna akissaatigitinneqartartut ukiumut 884.000 kronit missiliorlugit amerlassuseqarput. Taamaalilluni kommunit ataatsip soraarnerussutisiassanut tapiliutigisartagassai 88.400 kronit missaanniittartussaassapput.

Soraarnerussutisiassanut tapiliutigineqartartut akileraarutigineqartussat naatsorsorneqarnissaat sioqqullugu ilanngaatigineqartarput. Taamaattumik pisortat akileraarutitigit isertitarisartagaat annikitsumik eqqorneqartussaassapput, borgmesterit soraarnerussutisiassaminnut namminneerlutik akiliutigisassaak akissaatit 5 %-erisaat imaluunniit ukiumut 44.200 kronit missaanniittut akileraarutissap naatsorsorneqarnissaa sioqqullugu ilanngaatigineqartussaammata. Soraarnerussutisiassat tunniunneqartussanngorpata taamanikkussamut maleruagassat naapertorlugit akileraarutigitinneqartussaapput. Taamaattumik taamanikkussamut pisortat akileraarutitigit isertitarisassaannut iluaqusiisussaajumarput.

Borgmesterit soraarnerussutisiaqartarnerat pillugu maleruagassani maanna atuuttuni aningaasartutit annertussusissaanut apeqqutaasarpog borgmesteri katillugit qanoq sivistutigitsumik borgmesteriusimanersoq. Borgmesteriusimanerup sivistussusaa najoqqutaralugu ukiut soraarnerussutisiassanut katersiffiit naatsorsorneqartarput, taakkulu borgmesterip soraarnerussutisiarisinnaasaasa naatsorsorneqarneranni atorineqartarput.

Assersuutigalugu ukiuni arfineq pingasuni borgmesteriusimasup ukiut soraarnerussutisiassanut katersiffigisai ukiunut 28-nut naatsorsorneqassaaq. Tamannalu 1. april 2011-imi akissaateqartitseriaaseq naapertorlugu ukiumut 216.838 kroninik soraarnerussutisiaqarsinnaatitaarnermik naleqartinneqassaaq.

Ukiunut soraarnerussutisiaqalernissamut katersiffittut naatsorsunneqarsinnaasut ukiunut 37-nut amerlanerpaaffissaligaapput, taakkulu anguneqarsinnaapput ukiuni 20-ni atuussimagaanni. Tamatuma 1. april 2011-imi akissaateqartitseriaaseq naapertorlugu ukiumut 264.606 kroninik soraarnerussutisiaqartitsisoqarnissaa nassatarisavaa.

Aningaasartuutissat naatsorsorneqarnerini akissaatit soraarnerussutissiissutaasussat tjenestemanditut atorfeqarnermi akissaateqarfik 38 naapertorlugu tapigitinneqartullu tamaasa ilaatillugit tunngavigineqarput, kisiannili aningaasarsianut tapit ilaatinneqaratik.

Siunnersuutip imarisaa tunngavigalugu soraarnerussutisiaqartitsinissamut maleruagassat nutaat, maleruagassanut maanna atuuttunut sanilliussinertalerlugit, kommunit aningaasaqarnerannut sunniutigiumaagassaat skemami atsinnerusumiittumi assersuusiorluni paasiuminarsarneqarput.

Piffissat borgmesteriuffiusut ukiunit arfineq pingasunit siviinnerugaangata imaluunniit ukiunit 28-niit sivistunerugaangata siunnersuutip imarisaata kommunit

anigaasartuuteqarnerusalernerannik kinguneqassaaq. Piffissat borgmesteriuffiusut ukiuni arfineq pingasuniit ukiut 28-t tikillugit sivissusillit kommunit sipaaruteqarsinnaanerannik kinguneqartitsissapput.

3.2. Allaffissornikkut kingunerisassaat

3.2.1. Najukkami ataatsimiititaliat aamma immikkut ataatsimiititaliat

Kommunit najukkami ataatsimiititalianik immaqalu aamma immikkut ataatsimiititalianik pilersitsiortornissaat pilersitsinermut atatillugu ataatsimiititalianillu suleqatiginninnermut atatillugu kommunini allaffissornikkut suliaasaqarnerulernermik kinguneqarsinnaavoq. Suliassaqaqarneruleneq najukkami innuttaasut immikkullu ittunik soqutigisaqartut misilittagallillu il.il. akuutinneqarnerulernerisa iluaqutissartaannit nalimmassarneqaratarsinnaavoq, kommunini aalajangiunneqartartussanut toqqammavissat eqqarsaatigigaanni.

3.2.2. Soraarnerussutisiaqartitsinermut maleruagassat

Borgmesterit soraarnerussutisiaqartinneqartarnerannut maleruagassat allangortinneqarnissaannik siunnersuutip nassatarisaanik siunissami borgmesterinngortartussat tunuareeraangata soraarnerussutisiaqartitsisarneq pillugu kommunit pisussaaffeqartinneqartarunnaassapput. Taamaattumik siunissami borgmesterinngortartussanut tunngatillugu soraarnerussutisiaqartitsineq pillugu kommunit allaffissornikkut isumaginnittarunnaarlutillu tamakkununga akiliuteqartartussaajunnaassapput. Taamaattumik siunnersuut allaffissornermut tunngatillugu kommuninut killilimmik oqilisaassisuulerumaarpoq.

Siunnersuutip imarisaa allanik allaffissornermut tunngaattillugu sunniuteqangaassanganneqanngilaq.

4. Inuussutissarnermik ingerlataqartunut aningaasatigut allaffissornikkullu sunniutissat

Siunnersuut inuussutissarsiornermik ingerlataqartut aningaasaqarnerannut allaffissornerannullu sunniuteqartussaannngilaq.

5. Pinngortitamut, avatangiisimut peqqissutsimullu sunniutissat

Siunnersuut pinngortitamut, avatangiisinut peqqissutsimullu sunniuteqartussaannngilaq.

6. Innuttaasunut sunniutissat

6.1. Innuttaasut borgmesteritut toqqarneqartut

Siunnersuutip imarisaa borgmesterit ataasiakkaat borgmesteritut sulinerminnut atatillugu soraarnerussutisiaqartitaanerannut malunnaateqarluartumik allannguuteqartitsissaaq.

Nutaatut maleruagassaalersussatut siunnersuutigineqartut aningaasaqarnermut iluaqutissartai akornutissartaalu eqqarsaatigissagaanni apeqqutaasussaavoq qanoq sivilutigisumik borgmesteriusoqarsimanersoq. Tamanna immikkoortumi, tak. immikkoortoq 3.1.2 Soraarnerussutisiat, kommunit aningaasaqarnerannut sunniutaasussanut nallersuuppoq.

Siunnersuummi siunnersuutigineqartoq naapertorlugu borgmesterit soraarnerussutisiaqarnikkut aqqiivigineqarnissaasa nassatarisaanik soraarnerussutisiaqartitsiviup pineqartup soraarnerussutisiassat akilertussaajumaarpai, taama iliorsinnaanissamut tunngatillugu piumasagaatit naammassineqarsimalerpata.

Soraarnerussutisiaqartitsivimmiit pissarsiarineqartalerumaartussat qanoq amerlatigiumaarnerannut apeqqutaasussaapput aqqissuussinermut qanoq amerlatigisunik aamma qanoq sivilutigisumik akiliisoqarsimanersoq, inuunerup ilaani qanoq ilinikkut akilersuisoqarsimanersoq, soraarnerussutisiaqartitsiviup siunissami aningaasaliissuteqartarnermigut iluanaarutigisartagassai il.il.

Borgmesterinut ataasiakkaanut aamma pingaaruteqssaaq, pineqartoq siornatigut inuussutissarsiutigisami imaluunniit siornatigut atorfeqarnerminit PFA Soreernej-mi soraarnerussutisiaasaqarnissamik aqqissuussinermik peqarnerisooq, borgmesteriunermi soraarnerussutisiaqarnissamik aqqissuussinermut innersuunneqarsinnaassumik.

6.2. Innuttaasut sinneri

Najukkani ataatsimiititaliortoqarnissaa kommunalbestyrelsiniiit aalajangiunneqassappat, taava innuttaasut sumiiffinni najukkaminni tamat oqartussaaqataanerat aallaavigalugu suleriaaseqarneq tunngavigalugu aalajangiiniartarnermi sunniuteqaqataaanissaminut periarfissaat pitsaanerulissaaq.

Siunnersuutip imarisaa innuttaasunut allanik sunniuteqassanganneqanngikkallarpoq.

7. Sunniutaasinnaasut pingaarutillit allat

Siunnersuut allanikt pingaarutilinnik sunniuteqartussaangilaq.

8. Pisortat oqartussat aamma kattuffiit il.il. tusarniaavigineqarnerat

Tusarniaaneq siulleg

Siunnersuut piffissami 27. november 2012-imiit 2013-imi 7. januarip tungaanut makkununga tusarniaassutigineqarpoq:

KANUKOKA

Kommune Kujalleq

Kommuneqarfik Sermersooq

Qeqqata Kommunia

Qaasuitsup Kommunia

KANUNUPE

Aningaasaqarnermut Naalakkersuisoqarfik
Aningaasaqarnermut Sulisoqarnermullu Aqutsisoqarfik
PFA Soraarneq

Taakku saniatigut siunnersuut www.nanoq.gl-imi tusarniaassutigineqartut akornanni saqumitinneqarnikuuvoq.

Tusarniaassutigineqartumut akissuteqaatinik Kommuneqarfik Sermersuumiit aamma KANUKOKA-miit takkuttoqarpoq.

Kommuneqarfik Sermersooq imaattunik oqaaseqaateqarpoq:

Siunnersuutigineqarpoq § 31 A-p iluani periarfissaqartitisisoqassasoq, "Illoqarfinni tamani najukkami ataatsimiititaliamik - ataatsimiititalianilluunniit arlalinnik - kommunalbestyrelsit pilersitsisinnaassasut". Tamatumunnga pissutaavoq Nuummi ataasiinnaanngitsumik najukkami ataatsimiititaliortoqarnissaa pisariaqarsinnaammat, illoqarfiup iluani sumiiffinni assingiinningsuni pissutsit assigiinningsuusinnaasarnerat pissutigalugu.

Inatsisissap allannguutissaanut tunngatillugu Kommuneqarfik Sermersooq oqaaseqaatinik allanik ilanngusassaqaanngilaq. Akerlianik Naalakkersuisut kaammattorneqarput akissaateqartitsisarneq pillugu nalunaarut misissoqqinneqassasoq, tamatumalu tusarniaassutigineqarnissaanut Kommuneqarfik Sermersooq ilaatinneqarusussaaq.

KANUKOKA imaattunik oqaaseqaateqarpoq:

Missingiuutip pingaarnertut imarisai tassaapput aqutsinermut inatsimmi atuuttumut allannguutigitinniarnaqartut pingasut. Siullertut pineqartoq tassaavoq §15 imm.1, kommunalbestyrelsimiit anigallartarnermut tunngassuteqartoq. Siunnersuutip imarisaata nutaartaraa kommunalbestyrelsimi ilaasortaqa pineqartoq kommunalbestyrelsimiit anininissamik qinnuteqaammik tunngavilersukkamik aamma anigallarnissap qanoq sivistiginissaanut tunngasunik paasisutissartalimmik tunniussisalissasoq piumasqaateqartoqarmat. Tamatuma saniatigut qinnuteqaammut tunngavilersueqataasussanik uppernarsaatissatut takussutissanik noqqaasoqarsinnaanngussaaq.

Aappaattut missingiummi §31a illoqarfinni najukkami ataatsimiititalianik aamma immikkut ataatsimiititaliortoqarsinnaaneranut najoqqutassiisumik imaqarpoq. Tamatumunnga peqatigitillugu illoqarfinni najukkami ataatsimiititaliani ilaasortanut, kisiannili kommunalbestyrelsemi ilaasortaariinningsunuinnaq, akissaateqartitisisoqarsinnaanissaanut najoqqutassiisoqarpoq. Akissaatitut tunniunneqartarsinnaasussat ukiumut 74.000 kroninut amerlanerpaaffissaligaapput.

Pingajuattut siunnersuummi § 67 a-p imaraa borgmesterit inuttut namminerisaminnik, Inatsisartuni Naalakkersuisuni ilaasortanut atuutsinneqartut assinginiq,

soraarnerussutisiaqalernissaannut aaqqissuussivigineqartalernissaat pillugit Naalakkersuisut aalajangersaassasut.

Siunnersuutigineqartut kommunini aqutseriaatsit nalimmassaavigineqarnissaat pillugit siusinnerusukkut, ilaatigut qinersisarneq pillugu inatsisissatut siunnersuutip 1. januar 2013-imi atuutsilersup suliarineqarneranut atatillugu, kommuniniit kissaatitut saqqummiunneqarsimasunut naapitseriaanertut annerusumik isigineqarput. Kommunit tungaanniit pingaartumik kissaatigineqarsimavoq najukkami ataatsimiititalianik/siunnersuisoqatigiinnik pilersitsisoqarsinnaanissaanut ammaassisoqassasoq, taamaaliornikkut najukkami oqartussaaqataaneq qaffassarniarlugu, aamma ataatsimiititaliani ilaasortat ataatsimiititaliami suleqataanerminnut akissaateqartinneqarsinnaanissaat najoqutassatigut tunngavissaqartilerniarlugu.

Kommunini aqutseriaatsit pillugit Inatsisartut inatsisaannut allannguutissatut siunnersuutigineqartumut kommunit sisamaasut tapersersuipput. Taamaattoq Kommuneqarfik Sermersuup tusarniaassutigineqartumut akissutigisaa 19. december 2012-imeersoq - toqqaannartumillu Nunanut Namminermut allaffimmut nassiunneqarsimasoq - innersuussiffigineqarpoq - tassani siunnersuutigineqarpoq kommunabestyrelsit illoqarfinni tamani ataasiinnaanngitsumik - arlalinnilli - najukkami ataatsimiititaliorsinnaanissaannut §31a-mi periarfissiisoqassasoq.

Tamatumunnga tunngavilersuutigineqarpoq Nuummi ataasiinnaanngitsumik ataatsimiititaliortoqarnissaanik pisariaqartitsisoqarsinnaanera, illoqarfiup iluani sumiiffinni assigiinngitsuni pissutsit assigiinngissinnaasarmata. Illoqarfinni tamani ataatsimiititalianik ataasiinnaanngitsumik pilersitsoqarsinnaanissaa pisariaqartutut kommunalbestyrelsimiit naliliisoqarsimatillugu kommunit taamaaliornissaminnut periarfissaqartinneqarnissaannik siunnersuut KANUKOKA-p tapersersorpaa.

KANUKOKA-p iluarisimaarpaa siunnersuummi §31a, najukkami ataatsimiititalianut tunngassuteqartoq, ilusiligaanermigut ataatsimiititaliat qanoq katitigaasinnaanerannut - qanorlu atorneqarsinnaaerannut tunngatillugu - kommunalbestyrelsimut annertuumik kiffaangissusiliimmat. Aammattaaq iluarisimaarnarpoq siunnersuummi periarfissiissutigineqarmat najukkami ataatsimiititalianik pilersitsisoqartillugu piffissap qinigaaffiup tamarmiusup iluani, imaluunniit killilimmik piffissalikkamik atuuttussanngortinneqartunik ataatsimiititaliortoqarsinnaanera.

Kommune Kujalliup tusarniaassummut tunngatillugu KANUKOKA-mut allakkamini nalunaarutigaa, allannguutissatut siunnersuutit kommunalbestyrelsimi suliarineqarsimasut, tamatumunngalu atatillugu isummertoqarsimasoq kommunalbestyrelsimi ilaasortat najukkami ataatsimiititaliani ilaasortaasariaqanngikkaluartut.

Illoqarfinni najukkami ataatsimiititalianik pilersitsiortornerit, ataatsimiititalianilu ilaasortanut akissaateqartitsinerit, kommunit malunnaatilimmik aningaasartuuteqarnerulernerannik

nassataqarsinnaavoq, soorlu tamanna ersertoq ilaatigut inatsisissatut siunnersuummut nassuiaammi pisortani aningaasaqarnermut aamma allaffissornermi sunniutissat pillugit immikkoortumi. Tamanna tunngavigalugu kommunit tungaanniit kissaatitut saqqummiunneqarsimavoq kommuninut ataatsimoortumik tapiissutaasartut tullissaanik isumaqatigiinniutigineqalerpata tamakku aningaasartuutaanerulernissaannut taartisiassaqartitsisoqarsinnaajumaartoq. Ataatsimoortumik tapiissutit tullissaanik isumaqatigiinniutineqarnissaanni tamatuma ilanngullugu isumaqatigiinniutigineqarnissaa KANUKOKA-p tapersorsopaa.

Missingiummut tunngatillugu saqqummiunneqareersut saniatigut KANUKOKA allanik ilanngusassaqaangilaq.

Tusarniaanermi akissutigineqartunut tunngatillugu oqaaseqaatit:

§ 31 a-p allanngortinneqarnissaanik Kommuneqarfik Sermersuumiit siunnersuutigineqartoq siunnersuummut matumunnga taassumalu nassuiaatitaanut ilanngunneqarpoq.

Borgmesterinik borgmesterillu tulliinik kiisalu kommunalbestyrelsinut nunaqarfinnilu aqutsisunut ilaasortanik il.il. akissaateqartitsineq pillugu nalunaarut nutaaq suliarineqartussanngorpat atuutsinneqartussanngulerpallu kommunit aamma KANUKOKA tusarniaavigineqartussat Naalakkersuisut ilanngutissavaat.

Kommunabestyrelsini ilaasortat najukkami ataatsimiititaliani ilaasortaasariaqaangikkaluartut pillugit Kommune Kujallermiit oqaaseqatigineqarsimasut siunnersuutip imarisaanik allannguinnissamut tunngavissinngillat. Kommunalbestyrelsit taamaalillutik namminneq aalajangersinnaassavaat kommunalbestyrelsimi ilaasortaq najukkami ataatsimiititaliani ilaasortassatut toqqarneqarsinnaassanersoq.

Najukkami ataatsimiititaliorsinnaanermut inatsisissatut siunnersuutip aningaasaqarnermut sunniutigisinaasai eqqarsaatigalugit ataatsimoortumik tapiissutit isumaqatigiinniutigineqalerpata tamakku ilanngullugit isumaqatigiinniutigineqarsinnaanerannik KANUKOKA-miit kissaatigineqartumut atatillugu oqaatigineqassaaq, najukkami ataatsimiititaliorsinnaanermut maleruagassat qanoq annertutigisumik atussanerlugit, qanorlu periaaseqarniarnerlutik, kommunit namminneerlutik aalajangiisinnaassuseqartut. Siunnersuut tassaavoq najukkami ataatsimiititaliani ilaasortanut akissaateqartitsinnaanissamik kommuniniit kissaatitut saqqummiunneqarsimasumut naaperiaaneq. Taamaattumik Naalakkersuisut isumaqarput najukkami ataatsimiititaliaqarnermut atatillugu aningaasartuutaanerulersussat kommunini aningaasaqarnikkut killissaritaasut iluanni qanoq iliorluni aningaasalersorneqarsinnaassanersut kommunit namminneerlutik isumagissassarissagaat.

Tusarniaanerup aappaa

2013-imi Inatsisartunut qinersisoqarnera tunuliaqutaalluni siunnersuutip suliareqqinneqarnissaa uninngatinneqarpoq. Taamaaliornermi pisariaqalersimavoq siunnersuummik atuutsilersitsinissamik aalajangersakkat il.il. allanngortinneqarnissaat.

PFA Soreernej-mik oqaloqatiginninnerit tunuliaqutaralugit siunnersuut oqaaseqaatillu, borgmsterinut nammineq inuttut soraarnerussutisiaqalernissamik aaqqissuussisarnissanut tunngasut iluarsineqarput.

Taamatuttaa qqaaseqaatini ataasiakkaat allat iluarsineqarput.

Siunnersuut iluarsisaaq piffissami 3. juni 2013-miit 8. juli 2013-imut ukununga tusarniaassutigeqqinneqarpoq:

KANUKOKA

Kommune Kujalleq

Kommuneqarfik Sermersooq

Qeqqata Kommunia

Qaasuitsup Kommunia

KANUNUPE

Aningaasaqarnermut Nunamullu Namminermut Naalakkersuisoqarfik

Aningaasaqarnermut Sulisoqarnermullu Aqutsisoqarfik

PFA Soraarnej

Tusarniaanerp aappaani Kommuneqarfik Sermersooq-mit, Qeqqata Kommunianit aamma KANUKOKA-mit tusarniaanermi akissutinik tigusaqartoqarpoq.

Kommuneqarfik Sermersooq imaattunik oqaaseqaateqarpoq:

Kommunit aqunneqarnerat pillugu Inatsisartut inatsisissaattut siunnersuummut nutaamut Kommuneqarfik Sermersooq oqaaseqaatissaqanngilaq.

Iluaralugu paasivarput inatsisissatut siunnersuummi allanngortitami illoqarfimmi ataatsimi najukkami ataatsimiititalianik arlaqartunik pilersortisoqarsinnaaneranik periarfissaqartoq, soorlu taamatut siusinnerusukkut tusarniaanermi akissuteqarnermi Kommuneqarfik Sermersooq kaammattuuteqartoq.

Qeqqata Kommunia imaattunik oqaaseqaateqarpoq:

Aallaqqaammut oqaatigineqassaaq, kommunalbestyrelsi aningaasaqarnermulluunniit ataatsimiititaliaq tusarniummik suliaqarnissaminnut periarfissaqarsimannngillat, tassa tusarniut ataatsimiittoqareernerisa kingorna aatsaat tiguneqarsimammat, juunimilu paasisassarsiorluni angalasoqarlunilu innuttaasunik ataatsimiititsinerit ingerlanneqartussaammata ataatsimiinnissanik allanik pilersaaruteqartoqarsimannngimmat.

Qeqqata Kommuniata KANUKOKA-p 2013-imi januaarip 9-ani allagaa innersuussutigissavaa, aallagarlu pisariaqartutut isigalugu kommunip tapersorsorpa.

Qeqqata Kommunia tunngaviusumik allannguutissatut siunnersuutitut isumaqataavoq.

Allannguutissatut siunnersuutini kommunalbestyrelsimut ilaasortatut tunuarniuteqarallarnermi tunuavinniarnermilu suut piumasagaataaersut erseqqissarneqarput.

Qeqqata Kommuniata innuttaasut akuutinneqarnerisigut qaninnerulernissap nukittoqarnissaa isumaqatigivaa. Taamaattumik kommunip nunannaarutigivaa, sumiiffinni ataatsimiititalianik pilersitsinikkut allanillu ataatsimiititaliornikkut/siunnersuisuliornikkut kommissioniliornikkulluunniit akissarsiaqartitsisinnaalernissaq periarfissinniarneqarmat. Tamatumani aammaarluni KANUKOKA-p allagaa innersuussutigineqassaaq, taamaaliornerimmi kommunimut aningaasartuutinnussammata ersarissut, Qeqqata Kommuniatalu kissaatigivaa, aningaasartuutaanerulersussat ataatsimoortumik tapiissutit aqquutigalugit aaqqiivigineqarnissaat, taamalu isumaqatigiissuteqarnissami ilanngunneqassasut.

Sumiiffinni ataatsimiititaliornerni sumiiffinni ataatsimiititaliat kommunalbestyrelsip ataaniinnerat, taamalu aalajangiisinnaatitaannginnerat erseqqissarneqassaaq, kommunalbestyrelsilli siunnersortissamittut ivertissinnaagai.

Borgmesterit, allannguutissap atuutilerneratigut siunissami borgmesteriusalerumaartussanut atuuttussamik, pensionisiaqalernissaanni allatut aaqqiissuteqarsinnaanera Qeqqata Kommuniata uparuaaffissaqartinngilaa.

KANUKOKA imaattunik oqaaseqaateqarpoq:

Allannguutissatut siunnersut § 15, imm 1-ip – kommunalbestyrelsimiit tunuartarnermut alajangersakkamik allannguuteqartitsinermik imaqassaaq. Siunnersuut imaqarpoq kommunalbestyrelsimi ilaasortaasup kommunalbestyrelsimut saaffiginnissuteqarsinnaaneranik tunuarallarnissaq pillugu, tamatumalu qanoq sivissuseqarnissaa naatsorsuutigineqarsinnaanersoq pillugu. Tamatumalu saniatigut qinnuteqaammut uppersaasiinissamik piumasagaartoqarsinnaavoq. Allannguutissatut siunnersuutsikkut aamma pisinnaatitsisoqassaaq illoqarfinni ataatsimiititaliamik arlaqartunilluunniit pilersitsisarsinnaanermut, aammalu ataatsimiititalianik immikkut ittunik pilersitsisarsinnaanermut. Tamatumalu ilutigisaanik pisinnaatitsisoqassaaq illoqarfinni ataatsimiititaliani ilaasortaasunut, - taamaatorli kommunalbestyrelsimi ilaasortaariinngitsunuinnaq, - aningaasarsiaqartitsisinnaanermut. Pingajuattullu siunnersuut aamma imaqarpoq Naalackersuisut pisinnaatitsissummik, borgmesterit soraarnerussutisiaqarnermut namminersortumik aaqqissuussinernut ilanngussinnaalernissaannut aalajangersakkanik, maleruagassat Inatsisartunut aamma Naalackersuisunut ilaasortanut atuuttut naapertorlugit aaqqissuunneqartunik.

Siunnersuusiap ataasiakkaatigut teknikkikkut aallannguutit eqqaasanngikkaanni allannguutissatut missingersuusiaasup piffissami 27. november 2012 - 7. januar 2013 tusarniaassutigineqartup assigivaa. Inatsisartunulli qinersisoqarnera pissutigalugu allannguutissatut siunnersuut taamani unitsikkallarnejarpog, taamaattumillu maanna tusarniaanikkut kommuninut KANUKOKA-mullu nutaamik nassiunneqarluni.

Siunnersuut annertunerusutigut kommunit kissaataannik kommunit aqunneqarnerannut inatsisip iluarsartuuteqqinneqarnerannut atatillugu saqqummiunneqarsimasunik naapigiaanerupput, taakkualu kingullermik qinersisarnermut inatsimmut nutaamut 1. januar 2013 atortuulersumut atatillugu saqqummiunneqarnikuullutik. Kommuninit kissaataasimavoq sumiiffinni ataatsimiititalianik / siunnersuisoqatigiinnik pilersitsisinnaanermut ammaassisoqassasoq, sumiiffinni oqartussaaqataaneq annertusarniarlugu, maleruagassiorqassasorlu ataatsimiititaliani ilaasortaasut ataatsimiititaliani sulinerminnut atatillugu aningaasarsiaqarsinnaanngorlugit.

Kommunit sisamaasut tusarniaanermut siuliani eqqaaneqartumut atatillugu ukioq manna siusinnerusukkut kommunit aqunneqarnerat pillugu Inatsisartut inatsisissaattut siunnersuummut tapersersuinerminnik saqqummiussisimapput. KANUKOKA aamma tusarniaanermi akissuteqaatikkut 9. januar 2013 nassiunneqartukkut allannguutissatut siunnersuutaasunut tapersersuinerminik nalunaaruteqareerpoq.

Matumuunalu KANUKOKA-p tusarniaanermi akissutaasoq 9. januar 2013-imeersoq innersuullugu aqutsinermut inatsimmi allannguutissatut siunnersuutaasunut tapersersuinerminik nalunaaruteqassaaq.

Soorlu tusarniaanermut akissummi jannuar 2013-imeersumi nalunaarutigineqareersoq, illoqarfinni ataatsimiititalianik pilersitsiortorneq ilaasortallu akissarsiaqartinneqarnerat kommuninut malunnaatilimmik aningaasartuuteqarfiussaaq, soorlu tamanna Inatsisartunut siunnersuummut nassuiaatini aningaasaqarnermut allaffissornermullu immikkoortumi ersersinneqartoq. Taamaattumillu kommunit tungaanniit kissaatitut saqqummiunneqarnikuuvoq kommunit ataatsortumik tapiissutit isumaqatigiinniutigineqarnissaanni aggersumi aningaasartuutinut taakkununga matussutissarsissunneqassasut. KANUKOKA-llu tapersersorpaa tamanna ataatsimoortumik tapiissutit isumaqatigiinniutigineqarnissaanni aggersumi ilanngunneqassasoq.

Siunnersuutit uani pineqartut, aqutsinermut inatsisip allanngortinneqarnissaanut tunngasut, ersersitsisuupput inatsimmi pissutsinut piaartumik allanngortinneqartariaqartunut, taakkualu Inatsisartut ukiakkut ataatsimiinnissaanni aggersumi saqqummiunneqarnissaapput. Taamaakkaluartoq nalilernejarpog pisariaqartoq Namminersorlutik Oqartussat, kommunit aamma KANUKOKA-p akornanni oqaloqatigiittoqartariaqartoq, suliaasaqarfimmi uani annertuunik allannguuteqartitsisariaqarneq pillugu, tassunga ilanngullugu kommuninik aqutsinermut inatsit, qinersisarnermut inatsit kiisalu aningaasarsiaqartitsisarnermut

nalunaarut. Taamaattumillu KANUKOKA-p kaammattuutigissavaa ukioq manna oqaloqatigiinneq pineqartoq aallartinneqariissasoq.

Tusarniaanermi akissutunut oqaaseqaatit:

Tusarniaanermi akissutit tunngavigalugit siunnersuutip allanngortinneqarnissaa pissutissarsiffiunngilaq.

Najukkami ataatsimiititaliat kommunalbestyrelsit ataaniinnerat, taamalu aalajangiisinnaatitaanginnerat, kommunalbestyrelsimullu siunnersortaanerat pillugit Qeqqata Kommuuniata erseqqissaasoqarnissaanik kissaataanut tunngatilugu § 31 a, imm. 1, siulleg, tassungalu oqaaseqaatit innersuussutigineqassapput. Suliassa qarfiit imaluunniit suliassat kommunalbestyrelsimi imaluunniit kommunimi ataatsimiititaliamit isumagineqartussaangitsut pineqarpata, periarfissa qarpoq suliassa qarfinnik imaluunniit suliassanik taamaattunik najukkami ataatsimiititaliap suliaqarneranut atasumik isumagisaqarnermi nammineerluni aalajangiisinnaasutsimik kommunalbestyrelsip tunniussinissamik aalajangiinissaanut. Taamaattorli pinerni tamani kommunalbestyrelsi § 31 a, imm. 3 naapertorlugu najukkani ataatsimiititaliat pillugit maleruagassiortussaavoq, kommunalbestyrelsi najukkani ataatsimiititalinik pilersitsippat. Maleruagassani taakkunani assersuutigalugu kommunalbestyrelsip najukkani ataatsimiititaliat inissisimanerat aamma pisinnatitaaffii pillugit inatsisit killssarititaasut iluini iluarsisuteqarfigisinnaavai.

Najukkani ataatsimiititalianut tunngatilugu aningaasartuutaanerusussat matussutissarsissunneqarnissaasa ataatsimoortumik tapiissutit isumaqatigiinniutigineqarnissaani aggersumi ilaatinneqarnissaanik pillugu KANUKOKA-p oqaaseqaataanut tunngatilugu innersuussutigineqassaaq immikkoortumi tusarniaanermi siullermi tassunga tunngasut taaneqartut.

Suliassa qarfimmi pineqartumi inatsisinik annertuumik allannguuteqartitsisariaqarnerit pillugit oqaloqatigiinnerit ukioq manna aallartereerneqarnissaanik KANUKOKA-p kaammaattutaa Naalakkersuisut ilassilluarumavaat.

Tusarniaanermi akissutit tunngavigalugit allanik oqaaseqaateqartoqarnissaa pissutissarsiffiunngilaq.

Tusarniaanerup aappaata isumagineqareernerani inatsisiliornermi teknikkimut tunngasut aamma aaqqissugaanermut tunngasut ataasiakkaat siunnersuummi iluarsineqarput.

Siunnersuummi aalajangersakkanut ataasiakkaanut oqaaseqaatit

§ 1-imut

Nr. 1-imut.

Aalajangersagaq aqutsinermut inatsimmi atuuttumi § 15, imm. 2-mik ingerlatitseqqinneruvoq, taassuminnga erseqqissaaviginninnerulluni pitsanngorsaanerullunilu. Aamma imarisaata aaqqissugaanera pillugu allannguisoqarpoq.

Peqatigisaanik taaguut "ilaasortaajunnaarallarneq" allanngortinneqartoq imaalersillugu "akissaateqarani sulinnigiffeqarallarneq" imaluunniit "sulinnigiffeqarallarneq". Taamaalilluni erseqqissarneqarpoq kommunit aqunneqarnerat pillugu inatsimmi maleruagassat malillugit sulinnigiffeqarallarnissamik qinnuteqarneq aamma kommuninut qinersisarnermi inatsimmi maleruagassat malillugit ilaasortaajunnaarnissamik qinnuteqartarneq assigiinngitsuusut.

Sulinnigiffeqarallarnissamik qinnuteqaammi pissutaasutut tunuliaqutaasoq pillugu paasissutissaq ilaatinneqassaaq aamma tamatumunnga aporfiusutut pissutaasup qanoq sivistiginissaa naatsorsuutigineqarnersoq.

§ 15, imm. 2-p allannguuteqartinneqarneratigut kommunalbestyrelsimiit aninissamik qinnuteqaatit pillugit qinnuteqarnermut pissutaasut paasissutissanik ilaqartinneqartarnissaannik qulakkeeriniartoqarpoq. Taamaalilluni erseqqilluinnartuussaag qinnuteqaat anigallarnissamik qinnuteqaataanersooq aqutsinermi inatsimmi akissaateqarani sulinnigiffeqarallerneq pillugu maleruagassat naapertorlugit pineqarnersoq imaluunniit qinersisarnermi inatsimmi maleruagassat naapertorlugit aninissamik qinnuteqaat pineqarnersoq.

Nr. 2-mut.

§ 15, imm. 3-mi allannguut, § 15, imm. 2-mi taaguutip "ilaasortaajunnaarallerneq" imaalersillugu "akissaateqarani sulinnigiffeqarallarneq" imaluunniit "sulinnigiffeqarallerneq" allanngortinneqarnerata nassataraa.

Nr. 3-mut.

Maleruagassaq § 31, imm. 3-miittoq atorunnaarsinneqarpoq, tamatumunnga aallaaviuvoq taassuma allannguutitaqartinneqarluni § 31a-mut ilanngunneqarnera.

Nr. 4-mut.

Maleruagassat § 31, imm. 3-mi siunnersuutigineqartoq, allanneqarnermigut annikitsumik aaqqiivigineqarluni § 31, imm. 4-mi maleruagassamut naapertuuttuuvoq.

Nr. 5-mut.

Maleruagassami § 31 a-miittumi kommunalbestyrelsit najukkami ataatsimiititalianik aamma immikkut ataatsimiititalianik pilersitsisinaanissaat piareersaavigineqarpoq. Maleruagassami najukkami ataatsimiititaliat aamma immikkut ataatsimiititaliat immikkoortinneqarput.

§ 31a, imm. 1-4, najukkami ataatsimiititalianut tunngassuteqarput.

Illoqarfinni tamani najukkami ataatsimiititaliamik arlalinnilluunniit pilersitsisoqarsinnaavoq. Najukkami ataatsimiititaliat suut suliarissaneraat kommunalbestyrelsit namminneerlutik aalajangiiffigisinnaavaat. Najukkami ataatsimiititalianik pilersitsinissamut kommunalbestyrelsit pisussaaffeqanngillat.

Najukkami ataatsimiititaliat suliassaqaqarfinnik suliassaniluunniit aqutsinermut inatsit naapertorlugu kommunalbestyrelsip imaluunniit kommunini ataatsimiititalianit allanit isumagineqartussaataasunik suliaqarsinnaanermut piginnaatinneqarsinnaanngillat. Taamaalilluni innuttaasut imaluunniit suliffeqarfiit kommuni illuatungeralugu inatsitigut inissisimanerannut attuumassuteqartunik suliarinnittussanngortinneqarsinnaanatillu aalajangiisussanngortinneqarsinnaanngillat. Kisiannili kommunalbestyrelsit assersuutigalugu najukkami pisussanik pilersaarusiassanillu naammasserusutaminnik suliaqarnerminni najukkami ataatsimiititaliat akuliutsittarsinnaassavaat. Najukkami ataatsimiititaliat assersuutigalugu illoqarfiup pilersaarusiordfigineqarnerani, atuarfinnik sanaartornissani sunngiffimmilu sammisassaqaqtitsiffiusinnaasunik pilersitsiniarnermut atatillugu pilersaarusiornerni pingaarnersuillunilu tulleriaarinerni akuliutsinneqartarsinnaassapput. Aammattaaq najukkami ataatsimiititaliat oqalliffiusartutut atuutsinneqarsinnaapput, najukkami ajornartorsiutit eqqartorneqarsinnaasassallutik kommunalbestyrelsimullu imaluunniit ataatsimiititalianut ingerlateqqinneqartartussanik.

Najukkami ataatsimiititaliat qanoq katitigaanissaat kommunalbestyrelsimut aalajangiiffigineqartassaaq. Kommunabestyrelsi najukkami ataatsimiititaliami ilaasortassanut najukkami peqatigiiffinnut, innuttaasunut sumiiffinni aalajangersimasuni najugaqartunut, partiinut aamma kattusseqatigiilluni qinigassanngortitseqatigiinnut imaluunniit allanut innersuussuteqaqqusilluni saaffiginissinnaavoq. Ilanngullugu oqaatigineqassaaq najukkami ataatsimiititaliani kikkut ilaasortassatut toqqarneqassanersut kommunalbestyrelsip inaarutaasumik aalajangiiffigisassarigaa.

Ataatsimiititaliani ilaasortat toqqarneqartassapput, taamaalillutillu kommunini qinersisarnermi inatsit malillugu qinerneqartartussaanatik. Kommunabestyrelsip toqqassappagu najukkami ataatsimiititaliat katitigaaneranni marlunnik amerlanerusunilluunniit kommunalbestyrelsimi ilaasortaareersunik ilaasortaatsisoqassasoq, taava aqutsinermut inatsimmi § 35 naapertorlugu taasinerni qanoq amerlassuseqarneq tunngavigalugu taasisoqartassaaq.

Kommunalbestyrelsit najukkami ataatsimiititaliani ilaasortanut akissaateqartitsisinnaapput. Najukkami ataatsimiititaliani ilaasortanut akissaateqartitsisoqarsinnaanngilaq, ilaasortaqa kommunalbestyrelsimi ilaasortaareersimappat. Kommunabestyrelsimi ilaasortaaneermut akissaatigitinneqartut aamma najukkami ataatsimiititaliami suleqataanermi matussuseereertarput.

§ 31a, imm. 5 immikkut ataatsimiititalianik pilersitsinermut tunngasuvoq.

Maleruagassap taassuma kommunalbestyrelsit periarfissaqartissavai suliassanik immikkuullarissuteqartunik kommunalbestyrelsini imaluunniit ataatsimiititaliani suliarinninnissamut atatillugu immikkut ataatsimiititaliorsinnaanissaannut.

Maleruagassaq taanna atorneqarsinnaavoq assersuutigalugu suliassanut tunngatillugu soqutigisanik imminnut akerleriittunik nalaatsisoqarpat, taamaalillunilu inuussutissarsiornermik suliaqartut kattuffiisa paasiniaaffigineqarsimanissaat pingaaruteqaraangat. Aammattaaq maleruagassaq atorneqarsinnaasassaaq suliassanut tunngatillugu immikkut ilisimasaqartut, kommunip iluani pigineqanngitsut, ilaatinneqarnissaat pisariaqaraangat.

§ 31a, imm. 6, najukkami ataatsimiititalianut aamma immikkut ataatsimiititalianut tunngasuuvoq.

Aalajangersakkami erseqqissarneqarpoq najukkami ataatsimiititaliat aamma immikkut ataatsimiititaliat piffissap qinigaaffiup ingerlanerani qanorluunniit ilinikkut pilersinneqarsinnaasut. Kommunalbestyrelsinut qinersinerup kingorna kommunalbestyrelsimut qinigaarlaat aqqissuussinissaminnut kiffaangissuseqarsinnaasarnissaat qulakkeersimaniarlugu ilanngullugu erseqqissarneqarpoq ataatsimiititalianik pilersitsisoqaraangat ataatsimiititaliat taakku kommunalbestyrelsip qinigaaffiat sipporlugu atuuttussanngortinneqarsinnaanngitsut.

Nr. 6-imut.

Allannguut tassaavoq § 31-ip § 31-mut aamma § 31a-mut avinneqarnerisa kingunerisaa.

Nr. 7-mut.

§ 51, imm. 1-imi allannguut inatsisiliornermi teknikkimut tunngassuteqarpoq, nunaqarfinni aqutsisuni ataatsimoorussani aamma nunaqarfinni aqutsisini ilaasortaasinnaasut amerlassusiat pillugu maleruagassanik piviusumik allangortoqarneranik imaqaanngitsoq. Nunaqarfinni aqutsisunut ataatsimoorussanut aamma nunaqarfinnut aqutsisinut qinersisanermi kommuninut qinersisisarnermi inatsimi maleruagassanut aalajangersagaq ilassutaavoq.

Nr. 8-imut.

Aqutsinermut inatsimmi § 51, imm. 2-miittoq kommunini qinersisarnermut inatsimmi ilanngunneqarpoq. Taamaattumik maleruagassaq aqutsinermut inatsimmiittoq atorunnaarsinneqarpoq.

Nr. 9-imut.

Maleruagassat § 67-imiittut allanngortinneqarput, taamaalilluni taamaallaat borgmesterit il.il. akissaateqartitaanerannut tunngasunik maleruagassiorsinnaanermut najoqutassiisussanngorlugu. Borgmesterit il.il. soraarnerussutisiaqartitaasarneri maleruagassiuunneqarsinnaanissaannut tunngavissat § 67 a-mi ersipput.

Aammattaaq § 67-ip allanneqarnera annikitsumik allannguuteqartinneqarpoq.

Nr. 10-mut.

Maleruagassat § 67 a-miittut borgmesterit aamma taakku aappaasa meeraasalu soraarnerussutisiaqarsinnaanerit pillugit maleruagassiorsinnaanermut najoqqutassiisuupput.

Maleruagassaq taanna borgmesteriunermiit siusinnerusukkut tunuarsimasut soraarnerussutisiaqarsinnaanerannut tunngatillugu inissisimanerannut allannguuteqartitsinngilaq.

Aalajangersakkap nassatarissavaa siunissami borgmesterit soraarnerussutisiaqartarnerat pillugu maleruagassanik aalajangersaasoqarsinnaalernera tunngavissinneqassammat, borgmesterit inuttut namminneq soraarnerussutisiaqartalernissamik aqqissuusinnermut ilanngussinnaanngorlugit, Inatsisartuni Naalakkersuisunilu ilaasortat soraarnerussutisiaqartarnissaanik isumaqatigiissut atugaat tunngavigalugu. Aqqissuussineq pilersinneqassaaq kommuni aamma pineqartoq pillugit paasissutissat attuumassuteqartut PFA Soraarneruq-mut nassiunneqarneratigut. Tamatuma kingorna kommunit isumagissavaat PFA Soraarneruq-mut soraarnerussutisiassamut akilersuutit akilerneqartarnissaat.

Aqqissuussinerit siusinnerpaamik 2014-imi januaarip 1-anit sunniuteqartumik aatsaat pilersinneqarsinnaapput aamma kingumoortumik 2013-imi maajip 1-anit sunniuteqartumik pilersinneqarsinnaanngillat. Taamaalilluni soraarnerussutisiassanut akiliutissat ilaata akiligassap kommunimut akilerneqartussa qiffissamut 2013-imi maajip 1-anit 2013-imi decembarip 31-anut tunngasoq kommunip akilissanngilaa imaluunniit borgmestrit piffissamut tassunga nammineq akiliutissaat unerartinneqassanngilaq.

Maanna borgmesteriusut qaammatini marlunni piffissami ikaarsaariarfiusumi Inatsisartunut inatsisip atortuulerneraniit toqqarsinnaalissavaat maleruagassat sorliit malillugit aqqiivigineqarusunnerlutik. Toqqarneqartussa pineqartup siunissami borgmesteritut sulisarnissanut tamanut atatillugu pituttuisuussa.

§ 2-mut

Inatsisartut inatsissaata atuutsilerfissaata aalajangersaavigineqarnera.

Siunnersuutigineqarpoq Inatsisartut inatsisaat 1. januar 2014-imiit atuutsilissasoq.